


**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 14  
Hulyo 21, 2010  
[www.philippinerevolution.net](http://www.philippinerevolution.net)

Editorial

# Rebolusyon, di magagapi ng dahas at panlilinlang ng rehimeng US-Aquino



**S**a kabila ng pahayag ng rehimeng US-Aquino na bukas itong maki-pag-usapang pangkapayapaan sa mga rebolusyonaryong pwersa, di pa man ito nagsisimula'y sarisari nang balakid ang inilalatag nito.

Una na rito ang utos ni Benigno Aquino III sa AFP na durugin ang rebolusyonaryong kilusan. Para gawin ito, pangunahing sasandigan ng kanyang rehimen ang pasistang pwersang militar na may planong ibayong palakihin, gawing moderno at dagdagan ng armas, kagamitan at benepisyo para sa mga upisyal at tauhan nito.

Para maipatupad ito, nagkukumahog ngayon ang kanyang rehimen na magpalitaw ng daan-daang bilyong piso, sa harap ng mabigat nang krisis sa napakalaking depisit at pagkakautang ng gubyerno.

Alinsunod sa atas ng kanilang amo, inilatag din agad nina Defense Secretary Voltaire Gazmin at AFP Chief of Staff Ricardo David ang mili-

taristang linya ng rehimeng Aquino. Buong hambog na sinabi ni David na handa ang AFP na ipatupad ang atas ni Aquino na durugin ang rebolusyonaryong kilusan sa loob lamang ng tatlong taon. Idineklara naman ni Gazmin na dapat munang isuko ng BHB ang mga armas nito bago matuloy ang usapang pangkapayapaan. Katawa-tawa ang mga deklarasyong ito dahil hindi kailanman magsasalong ng armas ang rebolusyonaryong kilusan at paulit-ulit nang napatutunayan sa nakaraan na lahat ng itinatakda ng papet na rehimen at AFP na dedlayn para raw durugin ang rebolusyonaryong kilusan ay nananatiling satsat lamang.

Walang pinagkaiba sa tahasang pasistang linya nina Gazmin at David ang linya ng bagong pinuno ng Office of the Presidential Adviser on the Peace Process (OPAPP) na si Teresita Deles. Walang pasubaling kinatigan ni Deles ang linyang DDR (*disarmament, demobilization and reintegration* o pagdidi-sarma, pagbubuwag at pagbabalik-loob ng mga rebelde) ng rehimeng Arroyo. Kahit lantarang pangwawasak ito sa usapang pangkapayapaan, baluktot pang ikinatwiran ni Deles na "ang DDR ay doktrina na bahagi ng anumang

**Mga tampok sa  
isyung ito...**

**Planong paghirang kay  
Etta Rosales, umani ng  
batikos** PAHINA 4

**20 sundalo napatay,  
8 armas nasamsam  
ng BHB** PAHINA 6

**Balik-tanaw sa PEACE  
Bonds** PAHINA 7

prosesong pangkapayapaan.”

Papel ng OPAPP ang pagpapatupad ng imbing layuning tapusin ang armadong tunggalian nang may pagdiriin sa paggamit ng panlalansi at pambibitag, katambal ang pasistang dahas ng reaksyunaryong militar. Bukambibig ni Delles ang tinaguriang “apat na sandigan” ng rehimeng US-Aquino para kamtin umano ang kapayapaan—pagpapaunlad at rekonstruksyon ng ekonomya, pagpapaunlad ng mga saligang serbisyo, mahusay na pamamahala at pagreporma sa sektor panseguridad—na hinugot lamang sa bagong Counterinsurgency Guide ng US. Sa balangkas na ito, ang usapang pangkapayapaan ay gagamitin lamang na pambitag o kaya’y panlinlang, hindi bilang paraan para pag-usapan at lutasin ang mga ugat ng tunggalian.

Hungkag ang pormulang ito. Walang patutunguhan ang anumang pakulong “reporma” at pagpapabango ayon sa nabanggit na pormula dahil mula puno hanggang dulo ay batbat ng kabulukan at korapsyon ang buong sistemang kinapapalooban at pinaglilingkuran ng rehimeng US-Aquino. Sa likod ng lahat ng mapang-akit na postura

nito, ang patuloy na pangunahing ipinantatapat sa mamamayang lumalaban ay ang pasistang karahasan ng papet at reaksyunaryong estado.


Ang pamumuno sa OPPAP ng anti-komunistang si Delles ay nangangahulugan ng panginibabaw ng pangkatin ng mga tulad niyang nagkukunwang progresibo sa pagpapatakbo ng prosesong pangkapayapaan. Sa pamamagitan nila ay sasanib ang kunwa’y progresibong balangkas ng mga sosyal-demokrata sa pasistang balangkas ng AFP at iba pang pwersang panseguridad ng estado. Ilatag bilang kalutasan umano sa mga batayang suliranin ng mamamayan at gagawing pantapat sa pambansa-demokratikong programa ng rebolusyonaryong

kilusan ang mabababaw at mapanlinlang na mga programa ng mga sosyal-demokrata para umano sa karapatang-tao, reporma sa lupa at iba pa.

May mga pakulo pa si Delles para pagmukhaing “demokratiko” ang usapang pangkapayapaan pero sa katunaya’y mga paraan lamang ito para mapaglaruan at paliitin ang kahalagahan ng proseso. Bago ang pormal na negosasyon, lalawakan daw muna nila ang mga konsultasyon sa iba’t ibang sektor at sa mga lokalidad. Pinipili pa raw nila kung saan-saang erya sila pangunahing tututok. Pakana lamang ang pagkukunwaring ito para muling ilarga ang mga “lokalisadong usapang pangkapayapaan” na matagal nang tinatang-kang pagsilbihing paraan ng mga nakaraang papet at reaksyunaryong rehimen para uk-ukin ang usapan sa pambansang antas.

Dati nang sinubukan ng mga nakaraang rehimen ang pakanang ito. Kunwa’y kumokonsulta at naki-kipag-usap ang OPAPP sa malalawak na sektor ng lipunan, pero ang totoo’y kinakausap lamang ng rehimen ang kanyang sarili. Panggulo at panlito lamang ang pakanang ito. Para maging makatotohanan ang usapang pangkapayapaan, dapat itong maganap sa pagitan ng mga liderato ng dalawang panig sa pambansang antas at magdiin sa mga saligang usapin.

Sa katunayan, wala namang tagalang pangangailangan para sa mga kunwa’y malawakang konsultasyon at dayalog na ipinapakana ngayon ng OPAPP. Dati nang nailinaw at napagkasunduan sa The



Taon XLI Blg. 14 Hulyo 21, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

## Nilalaman

### Editorial

Rebolusyon, di magagapi ng dahas at panlinlang ng rehimeng US-Aquino 1

### Pananalanta ng pasistang estado

Patuloy ang pampulitikang pamamaslang 3  
Planong paghirang kay Etta Rosales 4  
Morong 43, palayain na! 5  
Mga upisyal militar sa Panay, isinakdal 5

### Matatagumpay na TO

20 sundalo patay, 8 armas nasamsam 6  
POW, pinalaya na 6

### Balik-tanaw sa PEACE Bonds

### Sa ibayong dagat

Mabuway na sitwasyon sa Nepal 8  
26 paramilitar, patay sa ambush sa India 8  
Welga sa India 9

### Balita

9

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Hague Joint Declaration of 1992 ang mga prinsipyo, balangkas, batayang usaping tatalakayin at ang pagkakasunud-sunod ng mga ito sa negosasyong pangkapayapaan. Ang pagpapakana ni Deles ng mga pekeng konsultasyon at dayalog ay paraan para isaisantabi ang nana nang mga kasunduan, guluhin ang adyenda at tabunan ang mga substantibong usapin.

Sa usapin ng negosasyong pangkapayapaan sa Moro Islamic Liberation Front (MILF), naglabas na ng pahayag ang tagapagsalita ni Aquino at ang bagong talaga na pinuno ng panel ng gubyrnong Aquino na hindi sila papayag na hatiin ang republika at sa anumang kaayusang "labag" sa konstitusyon. Ibig sabih'y ipagpapatuloy lamang nito ang tindig ng rehimeng US-Arroyo laban sa pagbubuo ng tunay na awtonomya para sa Bangsamoro. Taliwas na agad ito sa pinakapangunahing iginiginit ng MILF.

Wala na namang mangyayari sa usapang pangkapayapaan kung paglalaruan, tatamnan ng mga balakid, ililihis at gagamitin lamang ito para linlangin at itali ang mga rebolusyonaryong pwersa sa walang kahihinatnang pag-uusap habang paspasan ang pagsisikap ng rehimeng US-Aquino na durugin sila gamit ang pinalaki at pinalakas na pasistang AFP. Anuman ang mga pakana ng bagong papet at reaksyunaryong rehimen tungo rito ay hindi magwawagi.

Mayroon man o walang usapang pangkapayapaan, at gaano man katindi ang ikakasang mga kontra-rebolusyonaryong opensiba ng papet na reaksyunaryong estado, tuluy-tuloy at hindi malilihis ang mga rebolusyonaryong pwersa at mamamayan sa pagsusulong ng rebolusyonaryong pakikibaka hanggang makamit ang ganap na tagumpay. **AB**

## Patuloy ang pampulitikang pamamaslang sa bansa

**L**imang kasapi at tagasuporta ng mga progresibong grupo ang pinaslang sa loob ng unang dalawang linggo ng rehimen ni Benigno Aquino III. Kagaya noong nagdaang rehimen, ang itinuturong mga salarin ay mga armadong lalaking naka-*bonnet* at nakamotorsiklo na pawang mga galamay ng reaksyunaryong militar.

**Hulyo 16.** Tatlong araw bago ilibing si Fernando Baldomero, 61, ang kauna-unahang biktima ng pampulitikang pagpatay sa ilalim ng bagong rehimen, pinaslang ang kanyang pinsang si Zosimo Ingeniero, 57 anyos. Si Ingeniero, isang barangay tanod, ay natagpuang patay malapit sa kanyang bahay sa Barangay San Ramon, Malinao, Aklan. Limang basyo ng 9 mm ang nakita malapit sa kanyang bangkay. Naging aktibista siya noong dekada 1980 hanggang 1990.

**Hulyo 9.** Tinambangan at napatay sina Mark B. Francisco, 27 anyos, at Edgar Fernandez, 44 anyos, parehong kasapi ng ACT Teachers Party. Si Francisco, isang guro sa San Isidro Elementary School sa bayan ng Palanas, Masbate ay pauwi kasama ang apat na kapwa guro nang pagbabarilin sila sa Barangay Malibas. Nakaligtas ang mga kasama niyang guro. Si Fernandez, guro sa Roco C. Pahis Sr. Central School sa Masbate City ay pauwi rin nang siya ay pagbabarilin ng mga hindi nakilalang lalaki.

**Hulyo 9.** Binaril nang malapitan si Pascual Guevarra, 78 taong gulang, pangulo ng Agrarian Reform Beneficiaries Association sa bayan ng Laur, Nueva Ecija at isa sa pinakamatatandang lider ng Alyansa ng mga Magbubukid na Nagkakaisa 3100 (Alamana), na kanib ng Alyansa ng mga Magbubukid sa Gitnang Luzon at Kilusang Magbubukid ng Pilipinas. Ang mga

kasapi ng Alamana ay nakikibaka para mabawi ang 3,100-ektaryang lupain sa Laur na sakop ng Fort Magsaysay Military Reservation. Nagluluto ng hapunan sa kanyang bahay si Guevarra sa Barangay San Isidro, Laur bandang alas-4:45 ng hapon nang siya ay paslangin. Tinangka siyang tulungan ng kanyang apo ngunit pinagbabaril din ito ng salarin. Nakatakas ang berdugo nang tulungan ito ng kanyang kasamang nakasakay sa motorsiklong naghihintay sa labas ng bakuran ng biktima.

**Hulyo 9.** Tinambangan si Miguel Belen, reporter ng dwEB-FM ng Filipinas Broadcasting Network sa Nabua, Camarines Sur. Pauwi siya sa kanyang bahay sa Barangay San Jose Pagaraon nang pagbabarilin siya. Nagtamo si Belen ng tama ng bala sa kanyang leeg at katawan at nasa kritikal na kalagayan sa isang ospital sa Iriga City.

**Hulyo 6.** Limang lalaking naka-*bonnet* at nakaunipormeng militar ang umambus kay Dexter Legaspi, 36 anyos, isang guro at kasapi ng ACT Teachers Party sa Masbate City. Nakasakay sa isang traysikel sina Legaspi at kanyang asawa nang sila ay tambangan ngunit nakaligtas sila sa kamatayan.

**Hunyo 27.** Pinagbabaril sa dibdib si Fernando Bejino, 45, aktibistang magsasaka sa Siaton, Negros Oriental. Itinurong suspek sa pagpatay ang isang ahente ng 79th IB, ayon sa KARAPATAN-Central Visayas. **AB**



# Planong paghirang kay Etta Rosales, umani ng batikos

**M**ariin ang pagtutol ng mga grupong nagtataguyod sa karapatang-tao sa napipintong paghirang kay Loretta Ann Rosales bilang pinuno ng Commission on Human Rights (CHR). Si Rosales ay myembro ng kunwa'y progresibong partidong Akbayan at umupo sa Kongreso bilang kinatawan ng naturang partido noong 1998-2007.

Napakalaking insulto at hindi katanggap-tanggap para sa mga pamilya ng mga biktima, mga nagtataguyod ng karapatang-tao at maging mga empleyado ng CHR ang pagkakahirang kay Rosales. Kilala si Rosales sa kanyang pagka-

muhi sa mga biktima ng malalalang paglabag sa karapatang-tao at maging sa kanilang mga pamilya. Nitong nakaraang mga taon, paulit-ulit na binabansagan ni Rosales na "prente" ng Partido Komunista ng Pilipinas at ng Bagong Hukbong Bayan ang mga progresibong organisasyong kinabibilangan ng halos lahat ng mga biktima ng mga paglabag sa karapatang-tao. Hindi lingid sa kaalaman ni Rosales na ito ang ikinakatwiran ng mga berdu-

gong AFP para atakehin, paslangin at pahirapan ang napakaraming aktibista at sibilyan na binansagan nang mga tagasuporta, kundiman tahasang myembro, ng armadong rebolusyonaryong kilusan. Ganito ang ipinamalas ni Rosales sa loob ng siyam na taong walang habas na pamamaslang ng rehimeng US-Arroyo.


Kakoro rin ng AFP si Rosales sa paninira nito sa PKP at BHB laluna sa panahon ng mga eleksyon. Pinangunahan niya mismo ang kunwa'y imbestigasyon sa "panginikil" ng BHB sa mga kandidato sa pamamagitan ng pangungulekta umano para sa *permit to campaign* at iba pa. Pinalaki pa ni Rosales ang sariling importansya nang ideklara niyang target daw siya ng likidasyon ng BHB. Pinagtawa-

nan lamang siya ng mga kasama.

Isa rin sa mga pangunahing batayan ng pagtutol kay Rosales ang pagsalaula niya sa usapin ng bayad-pinsala para sa mga biktima ng pasistang dahas sa ilalim ng rehimeng Marcos. Noong 1986, sa pangunguna ng organisasyong SELDA (Samahan ng mga ex-Detainee Laban sa Detensyon at para sa Amnestiya) ay nagsampa ng *class suit* ang halos 10,000 biktima ng batas militar sa isang korte sa Hawaii para mabigyan sila ng danyos ng mga Marcos kapalit ng kanilang paghihirap. Matapos ang anim na taon ay ibinaba ng korte ang hatol nito pabor sa mga biktima at iniutos ang pagbibigay ng \$2 bilyong danyos sa kanila sa pangangasiwa ng SELDA.

Noong 1993, sa pamamagitan ng Presidential Commission on Good Government (PCGG), pumasok ang rehimeng Ramos sa pakikipagkasundo sa mga Marcos para sa hatiing 75%-25% kung saan ang 75% ay hahawakan ng gubyerno (gagamitin din ng gubyerno ang mas malaking bahagi nito) sa halip na idiretso at mapunta lahat sa mga biktima at ang 25% ay iiwan sa mga Marcos. Sa harap nito, ang ilang personahe tulad nina Rosales at oportunistang taksil na si Ramon Casiple ay nagbuo ng karibal na grupong tinaguriang Claimants 1081 para agawin ang naipanalang SELDA at ng kinakatawan nitong 10,000 biktima. Kinatigan ng Claimants 1081 ang pagdaan sa reaksyunaryong gubyerno ng naipanalang sa kaso laban sa mga Marcos, gayundin ang naging kasunduan ng gubyerno at mga Marcos.

Anang SELDA, kasuklam-suklam ang napipintong paghirang kay Rosales dahil sa ginawa niyang panghahati sa hanay ng mga biktima ng paglabag sa karapatang-tao at pakikipagkasundo sa mga Marcos. **AB**



## Morong 43, palayain na!

**P**alayain na ang Morong 43! Ito ang laman ng bukas na liham ng Civicus: World Alliance for Concern Participation sa bagong administrasyon ni Benigno Aquino III. Ang Morong 43 ay inaresto sa isang pagsasanay-medikal sa Morong, Rizal noong Pebrero sa paratang na mga kasapi sila ng Bagong Hukbong Bayan. Ang Civicus ay pandaigdigang alyansa ng mga organisasyong sibil na nakabase sa South Africa.

Hiniling ng Civicus kay Aquino na ipadama sa mga pamilya ng mga biktima ng paglabag sa karapatang-tao na may pagkilala siya sa batas at ipakita na walang lugar sa “bagong Pilipinas” ang gayong mga pang-aabuso. Hinimok nito si Aquino na imbestigahan ang Armed

Forces of the Philippines (AFP) hinggil sa pamamaraan nila ng pag-aresto, pagdedetine at pag-iimbestiga sa Morong 43.

Iginiit din ng Civicus na tapusin na ng rehimeng Aquino ang mga paglabag sa karapatang-tao sa pamamagitan ng pag-usig at pagli-

litis sa mga nagsagawa ng tortyur at iba pang pang-aabuso alinsunod sa mga batas ng Pilipinas at internasyunal na makataong batas.

Ang Morong 43 ay kinabibilangan ng dalawang doktor, isang nars at mga manggagawang pangkalusugan. Dalawa sa mga babaeng detenido ay nakatakdang manganak sa loob ng kulungan sa Camp Bagong Diwa—sina Carina Oliveros, 26, sa Hulyo at si Mercy Castro, 27, sa Oktubre. Mahigpit ang mungkahi ng marami nang mga lokal at internasyunal na grupo na kagyat nang palayain ang mga detenidong nagdadalantao. **AB**

## Mga upisyal-militar sa Panay, isinakdal sa hukumang bayan

**I**sinakdal sa hukumang bayan sa Panay ang ilang matataas na upisyal-militar sa Western Visayas na sangkot sa pagpaslang kay Fernando Baldomero, *provincial coordinator* ng koalisyong MAKABAYAN sa Aklan at kasapi ng Sangguniang Bayan ng Lezo. Sa isang pahayag nitong Hulyo 14, sinabi ni Concha Araneta, tagapagsalita ng National Democratic Front (NDF)-Panay na panimulang hakbang pa lamang ang pagsasampa ng kaso sa hukumang bayan para mabigyan ng katarungan ang kamatayan ni Baldomero.

Si Baldomero ay binaril ng dalawang lalaking naka-*bonnet* noong Hulyo 5 sa kanyang tahanan sa Kalibo, Aklan. Naghahanda siyang ihatid ang kanyang 12-taong gulang na anak na lalaki sa paaralan noon. Siya ang kauna-unahang aktibistang biktima ng ekstrahudisyal na pamamaslang sa ilalim ng rehimen ni Benigno Aquino III.

Sapat ang ebidensyang hawak ng NDF-Panay para sampahan ng kaso sina Maj. Gen. Vicente Porto, hepe ng 3rd Infantry Division ng Philippine Army (3ID-PA); Brig. Gen. Gerardo Layug, hepe ng 301st Infantry Brigade ng Philippine Army (301Bde-PA); at mga elemento

ng Civil Relations Service (CRS) sa ilalim ng nasabing mga kumand.

Ayon sa NDF-Panay, ilang buwan bago paslangin si Baldomero ay nakatanggap siya ng sulat-babala na nagpapatigil sa kanyang mga aktibidad sa pulitika. Noong Marso 19, hinagisan ng dalawang granada ang bahay ng kanyang mga magulang sa Lezo. Dalawang linggo bago siya paslangin, binansagan ng mga elemento ng CRS ng 3ID-PA sa kanilang “Army Hour Program” si Baldomero bilang “prenteng tauhan ng mga teroristang komunista” at ang MAKABAYAN bilang “prenteng organisasyon ng mga terorista”.

Ang gayong akusasyong pamubliko ay katumbas ng pag-aatas sa lahat ng mga ahente ng estado na paslangin ang target na mga aktibista. May pananagutan din ang mga elemento ng CRS sa paglulunsad nito ng programang anti-Baldomero.

Ang mga pagkilos na ito ng 3ID at 301Bde-PA ay malaking indikasyon na binalak ng militar ang pagpatay kay Baldomero. Lalo nilang idiniin ang kanilang mga sarili nang sabihin ng tagapagsalita ng AFP ang bulaang linya na ang krimen ay resulta umano ng purgahan sa hanay ng mga rebolusyonaryong pwersa. Walang naniniwala sa kasingungalingang ito ng militar, ani Araneta. Alam mismo ng publiko at kahit ng reaksiyunaryong militar at pulisya na mga ahenteng paniktik at kanilang mga galamay ang pumatay kay Baldomero. Duguan ang mga kamay ng militar, dagdag ng NDF-Panay.

Sa ngayon ay patuloy pa ang pangangalap ng mga dagdag na ebidensya kaugnay ng krimen. Maglalabas ang hukumang bayan ng mandamyento de aresto oras na makumpleto ang mga rekisito. **AB**



## 20 sundalo napatay, 8 armas nasamsam ng BHB

**D**i bababa sa 20 sundalo ang napatay at 20 ang nasugatan sa mga taktikal na opensiba ng Bagong Hukbong Bayan (BHB) sa iba't ibang dako ng kapuluhan mula Mayo hanggang Hulyo. Kabilang sa mga nasamsam ng mga gerilya ang isang masinggan at limang M203 *grenade launcher*.

**Hulyo 16.** Napatay si Sr. Insp. Alfonso Derraco, hepe ng pulisya sa Benito Soliven, Isabela at malubhang nasugatan ang limang iba pa nang sila ay tambangan ng BHB sa Barangay Danipa ng naturang bayan. Bukod sa mga pulis, kabilang sa malubhang nasugatan ang isang sarhentong kabilang sa Military Intelligence Battalion (MIB). Rumesponde ang mga pulis sa naiulat na pagsunog ng BHB sa traktora ng isang despotikong panginoong maylupa sa Barangay Villa Luz nang sila ay tambangan.

**Hulyo 9.** Nalipol ng BHB ang pitong sundalo ng *strike force* ng 52nd Division Reconnaissance Company (DRC) sa isang ambus sa Sityo Chawer, Samoki, Bontoc, Mountain Province. Nakasamsam ang BHB ng apat na M203, isang M14, isang M4 *carbine* at iba pang kagamitang militar. Kabilang sa mga napatay na sundalo ang kanilang kumander na si 1Lt. Lito Punio. Walang natamong kaswalti ang BHB.

Tinambangan ang pasistang yunit malapit sa *tactical command base* ng 501st Brigade sa Barangay Talubin kung saan sila nanggaling. Pumunta sila sa Barangay Samoki para suportahan ang iba pang tropa ng 5th ID na naglulunsad ng mga operasyong militar laban sa BHB.

Para pagtakpan ang kanilang kahihyan, sinabi ng militar na pa-

punta umano sa isang misyong medikal ang mga tinambangang sundalo.

**Hulyo 9.** Walong elemento ng Marines Battalion Landing Team 8 (MBLT8), kabilang ang isang upisyal ang nasugatan nang pasabugan ng mga Pulang mandirigma ng BHB ang sinasakyan nilang trak sa Sityo Itabiak, Barangay Agutaya, San Vicente, Palawan. Ang tinambangang tropa ay bahagi ng Special Operations Platoon ng MBLT8. Dinala sa ospital ng Western Command sa Puerto Princesa City sina

2Lt. Willy Pait at pito niyang mga tauhang sugatan.

**Hunyo 23.** Matapos ang tatlong beses na labanan sa kadiliman ng gabi sa pagitan ng BHB at militar, dalawang sundalo ang napatay at dalawang iba pa ang nasugatan sa Barangay Poponton, Las Navas, Northern Samar.

**Mayo 31.** Nasamsam ng mga Pulang mandirigma ang isang K3 *light machine gun* at isang M203 *grenade launcher* nang ambusin nila ang mga sundalo sa pagitan ng Barangay GM Osias at Barangay Bangon sa Gamay, Northern Samar. Pitong sundalo ng AFP ang napatay at tatlo ang nasugatan sa naturang ambus. Isang Pulang mandirigma ang nagbuwis ng buhay.

**Mayo 3.** Tatlong tropa ng AFP ang napatay at dalawa ang nasugatan nang makaengkwestro nila ang mga gerilya ng BHB sa pagitan ng Barangay Nagbubtac sa bayan ng Palapag at Barangay Lanubi sa bayan ng Laoang, Northern Samar. **AB**

### POW, pinalaya na

**P**inalaya na ng Bagong Hukbong Bayan (BHB) sa batayang makatao si Sgt. Bienvenido Arguelles Jr. ng 25th IB nitong Hulyo 20 sa isang liblib na lugar sa Monkayo Compostela Valley. Inientrega ng BHB si Arguelles sa kura paroko ng Monkayo at mga lokal na upisyal ng naturang bayan.

Si Arguelles ay inaresto sa isang tsekpoynt ng BHB noong Hunyo 19 sa Sityo Mabatas, Barangay Upper Ulip, Mt. Diwalwal, Monkayo, Compostela Valley. Ilang oras makaraang lumaya siya ay nakapiling na niya ang kanyang pamilya.

Bago ito, pinalaya ang menor-de-edad na elemento ng CAFGU na kasama niyang inaresto.

Ang pag-aresto kay Arguelles ay babala sa mga militar at pulis na nag-ooperey sa loob ng mga baseng gerilya, laluna yaong nani-niktik laban sa mga Pulang mandirigma at masa, ayon kay Ka Rigo-berto Sanchez, tagapagsalita ng Merardo Arce Command ng BHB sa Southern Mindanao Region. Dapat aniya itong magsilbing babala sa mga nagsisilbing protektor ng mga dayuhan at lokal na kumpanyang nagsasagawa ng malawakang operasyong mapagsamantala sa masa at mapaminsala sa kapaligiran. **AB**

# Balik-tanaw sa PEACe Bonds

**H**indi maitatago ng anumang pagmamalinis ng mga upisyal mula sa nagdaang rehimeng US-Arroyo ang kinasasangkutan nilang mga katiwalian.

Kabilang sa mga may pinakamalaking pananagutan dito sina Corazon "Dinky" Soliman, na muling hinirang ni Pres. Benigno Aquino III bilang kalihim ng DSWD, at Teresita Deles, na ibinalik bilang Presidential Adviser on the Peace Process. Sangkot sila sa maanomalyang pagbebenta ng PEACe Bonds at sa kwestyunableng pinuntahan ng pondo mula rito. Ang *bond* (bono) ay instrumento ng gubyrerno para makapangutang sa publiko o iba't ibang institusyon at bangko. Tulad ng iba pang utang, ito ay binabayaran nang may interes matapos ang takdang panahon.

Ang PEACe (Poverty Eradication and Alleviation Certificate) Bonds ay itinulak ng Code NGO (Caucus of Development NGOs) nina Soliman at Deles. Ayon sa mga pahayag ng Code NGO, inilabas ang naturang mga bono para makalikom ng pondo para sa kanilang mga proyekto laban sa kahirapan.

Ang Code NGO ay alyansa ng mga hungkag na NGO na pinatatakbo ng mga kroni at malalapit na kaibigan ni Gloria Arroyo at ngayon nama'y nasa kampo at administrasyon na ni Aquino. Hindi lamang sangkot dito si Soliman at ang kanyang asawang si Hector Soliman. Sila ang namumuno rito, kasama nina Deles at Marissa Camacho-Reyes, kapatid ng noo'y kalihim ng Department of Finance na si Jose Camacho.

Noong Oktubre 2001, inilabas ng Bureau of Treasury ang PEACe Bonds na nagkakahalaga ng mahigit P35 bilyon (P10.17 bilyon na batayang halaga at P25 bilyon na interes na babayaran matapos ang sampung taon.) Minanipula ang su-basta para makopo ng kakutsaba

nilang Rizal Commercial Banking Corporation (RCBC) ang mga bono. Nagsisilbi noon ang RCBC na daluyan sa pagpapatupad ng pakana ng Code NGO. Para masolo ng RCBC ang pamamahala sa mga bono, inilingid sa ibang bangko at *bidder* ang paglalabas ng naturang bono hanggang sa huling linggo.

Sa kabuuang P10 bilyong naibentang bono, umabot sa P1.48 bilyon o halos 15% ang komisyong napunta sa Code NGO, P200 milyon sa RCBC at dagdag na P100 milyon sa dalawang personahe na nagsilbing tagapamagitan nila. Kinutsaba rin nila ang Bureau of Internal Revenue para ilibre sa buwis ang kita mula sa pagbebenta ng PEACe Bonds.

Nang sitahin noon ng Senado ang maanomalyang transaksyon, iginiit ng mga upisyal ng Code NGO na 10% lamang umano ng kinita nito sa pagbebenta ng PEACe Bonds ang itinira nito para sa sariling mga operasyon. Ang nalalabing 90% o P1.318 bilyon ay ipinasok sa itinatag nitong Peace Equity Access for Community Empowerment Foundation (PEF.) Ang PEF na diumano ang magpapatupad ng mga proyekto sa balangkas ng programang kontra-kahirapan ng rehimeng Arroyo. Pero sa pagdinig sa Senado matapos maangkat ang anomalya, napag-alamang si Soliman at ang kanyang asawa ang nasa likod ng PEF.

Saan napunta ang pera? Ayon

kay Soliman, tinatanong pa niya ito sa mga namamahala matapos siya "umalis" sa Code NGO. Palusot niya na nagamit ito sa mga proyektong pantulong sa mamamayan, tulad ng pagtatayo ng maayos na sistema para sa maiinom na tubig at pagpapautang sa mga nagtatayo ng maliitang negosyo (*micro-financing*). Ngunit walang patunay na nagamit sa pinagsasabi nilang mga proyekto o napakinabangan ng mamamayan ang kinita nila sa PEACe Bonds.

Mas malaki pang problema ngayon na sa 2011 ay kailangan nang bayaran ng gubyrerno ang kabuuang P35 bilyong halaga ng PEACe Bonds.

Wala na ngang napala ang mamamayan sa hungkag na mga kontra-kahirapang proyekto ng Code NGO at rehimeng Arroyo, nakaatang pa sa kanila ang pagbabayad sa kinita nito mula sa pagbebenta ng naturang bono.

Ang mas mabigat na pananagutan ni Soliman bilang dating kalihim ng DSWD sa ilalim ng rehimeng Arroyo ay ang pagpapaliwanag kung ano na ang nangyari sa halos P8 bilyong pondong nagmula sa PEACe Bonds na para umano sa mga proyektong kontra-kahirapan ng gubyrernong Arroyo. Walang nakakaalam kung anu-ano ang naging mga proyekto, kung saan-saang ahensya o lokal na gubyrerno ito napunta, at kung sinu-sino ang nakinabang dito. Walang umaamin sa hanay ng Code NGO at walang ibang ginawa si Soliman kundi tumanggi na may kinalaman siya rito.





# Mabuway na sitwasyon sa Nepal

**N**agbitiw sa pwesto si Madhav Kumar Nepal bilang punong ministro ng Nepal noong Hunyo 30 bunga ng paggigiit ng mga Maoistang oposisyunista sa loob ng parlamento at mga protesta ng mamamayan sa lansangan.

Si Kumar Nepal ay iniluklok ng rebisyunistang Communist Party of Nepal-United Marxist Leninist (UML) at konserbatibong Nepali Congress Party (NC), makaraang magbitiw noong Mayo 2009 ang Maoistang punong ministro na si Pushpa Kamal Dahal.

Naobligang magbitiw si Dahal nang hadlangan ng taga-UML na presidente ng bansa ang desisyon niyang tanggalin ang hepe ng hukbo na si Gen. Rookmangud Katawal. Tahasang binalewala at nilabag ni Katawal ang instruksyon ni Dahal na kilanlin ang pamumuno ng gubynong sibilyan, huwag na munang palakihin sa pamamagitan ng mga bagong rekrut ang hukbong minana pa sa napatalsik na hari at sa halip ay madaliin na ang pagsasanib ng Pulang hukbo sa lumang hukbo alinsunod sa mga probisyon ng kasunduan sa tigil-putukan at pagbubuo ng bagong gubyrno. Pero mahigit isang taon nang nanunungkulan si Kumar Nepal ay hindi pa niya nakokonsolida ang prosesong pangkapayapaan ng Nepal at bigo siyang itaguyod ang bagong konstitusyon, na isa sa mga rekisito sa pagbubuo ng bagong gubyrno. Sinisisi ng NC at UML ang CPN-M sa di pag-usad ng bagong konstitusyon, pero sa katunaya'y ang dalawang partidong ito ang naglalagay ng mga balakid sa mga saligang reporma at nagpapataw ng maraming bagong kondisyon sa CPN-M sa proseso ng pagbubuo ng bagong konstitusyon.

Noong Abril 30, umabot sa mahigit 125,000 mamamayan sa pamumuno ng CPN-M ang nagrali sa

syudad ng Kathmandu para ipanawagan ang pagbibitiw ng punong ministro at ng kanyang gubyrno upang mabigyan ang mayoryang CPN-M ng karapatang mamuno sa isang gubyrno ng pambansang pagkakaisa. Kinabukasan, naglunsad din ang mga mamamayan ng Nepal ng pangkalahatang welga na pumaralisa sa buong Nepal sa loob ng isang linggo. Sinubukan itong supilin ng mga *riot police* pero nabigo sila dahil sa militanteng paglaban ng mamamayan.

Sa hangad na magkasundo at mapadali ang proseso ng pagbabalik ng CPN-M sa kapangyarihan bilang pinakamalaking partido sa Nepal, sinikap pa rin nitong makipag-usap sa NC at UML. Sa pinakahuli nilang pag-uusap nitong Hulyo 11, nagpataw ng mga panibagong kondisyon ang NC at UML sa pagsasanib ng rebolusyonaryong hukbo at lumang hukbo. Bukod sa panibagong pagpili at pagbibilang ng mga pwersa ng Pulang hukbo, igi-

niit ng dalawang partido na dapat lusawin din ang pwersang paramilitar ng CPN-M sa anyo ng Young Communist League at ibalik din ng CPN-M ang lahat ng mga pag-aari ng naghaharing uri at kaaway ng rebolusyon na kinumpiska ng CPN-M at Pulang sa loob ng isang dekada ng digmang bayan. Ayon sa NC at UML, hangga't hindi nagiging sibilyang partido ang CPN-M at hangga't hindi nito naibabalik ang lahat ng pag-aaring kinumpiska nito ay hindi nila matataggap na magbalik sa poder ang CPN-M kahit ito ang may pinakamalaking representasyon sa parlamento.

Sa layuning makausad ang proseso, pumayag ang CPN-M sa mga kondisyon ng dalawang partido at nagkaisa sila sa tatlong-buwang dedlayn sa pagpapatupad nito.

Sa kasalukuyan, nananatili pa ring mabuway ang sitwasyong pampulitika sa Nepal. Wala pa ring napipiling kapalit ni Kumar Nepal bilang punong ministro. Pagsisikap muli ng parlamento na makapaghalal ng bagong punong ministro sa pulong nito ngayong Hulyo 21. AB

## 26 paramilitar, napatay sa ambus sa India

**D**alawampu't anim na elementong paramilitar ang napatay at dalawa ang nasugatan sa ambus na inilunsad ng mga rebolusyonaryong pwersa sa Chhattisgarh sa India noong Hunyo 29.

Ang mga kaswalti ay mga elemento ng Central Reserve Police Force (CRPF) na naglalakad pauwi matapos maglunsad ng *clearing operation*. Nang makarating sila sa Dhodai, 300 kilometro ang layo sa Raipor, kabisera ng Chhattisgarh, bigla silang inatake ng mga Maoistang pwersa. Umabot ng tatlong oras ang labanan at nahirapang makatakas ang natira pang mga kaaway. Nakaatras lamang sila nang dumating ang mga reimporsment. AB

## Welga sa India

**I**sang pambansang welga ang inilunsad ng mamamayan ng India noong Hulyo 5 para tutulan ang desisyon ng gubyrerno na ihinto ang subsidyo sa presyo ng langis para raw makaa-hon sa lumalaking depisit sa badyet. Pinamunuan ang welga ng mga partidong oposisyon, ang Bharatiya Janata Party (BJP) kasama ang Communist Party of India-Maoist (CPI-M) at Communist Party of India (CPI).

Tinatayang aabot na sa 5.5% ng Gross Domestic Product (GDP) ang magiging depisit sa badyet ng India ngayong 2010-2011.

Ang pagkakatanggal ng subsidyo ay nagbunga ng pag-sirit ng presyo di lamang ng mga produktong petrolyo kundi ng iba pang mga bilihin, at labis itong ikinagalit ng mamamayan. Halimbawa, ang presyo ng gaas na ginagamit ng milyon-milyong mahihirap na mamamayan ay biglang tumaas nang 33% o 3 *rupee* (salapi sa India) bawat litro. Ang presyo ng gasolina ay tumaas nang 6.7% o 3.5 *rupee* bawat litro at ang *liquefied petroleum gas*, 35 *rupee* bawat tangke. Kaugnay nito, tumaas ang tantos ng implasyon nang mahigit 12% mula nang ipatupad ang deregulasyon ng presyo ng langis.

Pinakaapektado sa 12-oras na welga ang mga estado ng Bihar, Punjab, Karnataka, West Bengal, Kerala, Andhra Pradesh, Rajahmundry, Orissa, Madhya Pradesh, Chhattisgarh at Haryana, na pawang pinamunuan ng mga oposisyunistang partido. AB

## Pambansang pagkilos ng kabataan-estudyante, tagumpay

MATAGUMPAY ang isinagawang pambansang araw ng pagkilos ng mga kabataan at estudyante noong Hulyo 16 na may layong iparating sa bagong rehimeng Aquino ang mga karaingan ng sektor.

Mahigit 1,000 estudyante na nagmula sa iba't ibang mga unibersidad, kolehiyo at hayskul ang lumahok sa pagkilos, bukod pa sa mga kabataang hindi nag-aaral. Ang National Day of Action for Education ay pinamunuan ng mga progresibong organisasyon ng kabataan. Nagmartsa sila mula sa tapat ng University of Sto. Tomas (UST) sa España hanggang sa Mendiola sa Maynila. Nakiisa rin sa kanila ang mga kabataang Pilipino-Amerikano.

Nagkaroon din ng kasabay na kilos-protesta ang mga kabataan sa Angeles City at Cebu City. Nagpiket sila sa harapan ng panrehiyong tanggapan ng Commission on Higher Education (CHED). Sa Iloilo City, naglunsad ng martsa-

rali sa loob ng kampus ng University of the Philippines-Iloilo, gayundin sa University of the Philippines sa Tacloban at Mindanao.

Paglalaan ng sapat na badyet ng gubyrerno para sa edukasyon ang pangunahing panawagan ng mga kabataan-estudyante. Sa pamantayan ng United Nations Educational, Scientific and Cultural Organization (UNESCO), 6% ng Gross Domestic Product (GDP o kabuuang kita sa loob ng bansa) ang dapat ilaang badyet sa edukasyon.

Iginiit din nila kay Aquino ang pagpapahinto sa sunud-sunod na pagtaas ng matrikula at iba pang mga bayarin sa mga eskwelahan. Hiling din nila na repasuhin ang mga anti-estudyanteng patakaran tulad ng Education Act of 1982 at Campus Journalism Act of 1991, kilalanin ang mga karapatan ng mga guro at istap ng eskwelahan at itaguyod ang awtonomya ng mga konseho at pahayagang pang-estudyante.

## Mga tsuper, naglunsad ng protest caravan

NAGLUNSDAD ng *protest caravan* mula Quezon City hanggang sa Mendiola sa Maynila noong Hulyo 15 ang mga myembro ng Pinagkaisang Samahan ng mga Tsuper at Operators Nationwide (PISTON) bilang panimulang pagkilos kaugnay ng nalalapit na State of the Nation Address ni Benigno Aquino III.

Layunin ng pagkilos ang iparating ng sektor sa transportasyon ang mga kahilingan nito kay Aquino, ayon sa PISTON. Una na rito ang pagbasura sa *oil deregulation law* na isa sa pinakamalalaking pasakit sa mga motorista. Ikalawa ang tuluyang pagpapahinto sa si-

ngil sa South Luzon Expressway (SLEX) at pagtatanggal ng *value-added tax* sa langis. Ikatlo ang pagrepaso sa maanomalyang proyekto ng Land Transportation Office (LTO) at Stradcom Corp. kagaya ng naudlot na Radio Frequency Identification Device (RFID). At ikaapat, parusahan si Arroyo sa malalang korapsyon nito sa nakalipas na siyam na taon.

Iginiit ng PISTON na dapat tugunan ni Aquino ang kanilang mga iginigit para hindi masira ang kanyang imahe at hindi siya tuluyang itakwil ng mga drayber at malawak na mamamayan.


**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 14  
Hulyo 21, 2010  
[www.philippinerevolution.net](http://www.philippinerevolution.net)

Editorial

# Rebolusyon, di magagapi ng dahas at panlilinlang ng rehimeng US-Aquino



**S**a kabila ng pahayag ng rehimeng US-Aquino na bukas itong maki-pag-usapang pangkapayapaan sa mga rebolusyonaryong pwersa, di pa man ito nagsisimula'y sarisari nang balakid ang inilalatag nito.

Una na rito ang utos ni Benigno Aquino III sa AFP na durugin ang rebolusyonaryong kilusan. Para gawin ito, pangunahing sasandigan ng kanyang rehimen ang pasistang pwersang militar na may planong ibayong palakihin, gawing moderno at dagdagan ng armas, kagamitan at benepisyo para sa mga upisyal at tauhan nito.

Para maipatupad ito, nagkukumahog ngayon ang kanyang rehimen na magpalitaw ng daan-daang bilyong piso, sa harap ng mabigat nang krisis sa napakalaking depisit at pagkakautang ng gubyerno.

Alinsunod sa atas ng kanilang amo, inilatatag din agad nina Defense Secretary Voltaire Gazmin at AFP Chief of Staff Ricardo David ang mili-

taristang linya ng rehimeng Aquino. Buong hambog na sinabi ni David na handa ang AFP na ipatupad ang atas ni Aquino na durugin ang rebolusyonaryong kilusan sa loob lamang ng tatlong taon. Idineklara naman ni Gazmin na dapat munang isuko ng BHB ang mga armas nito bago matuloy ang usapang pangkapayapaan. Katawa-tawa ang mga deklarasyong ito dahil hindi kailanman magsasalong ng armas ang rebolusyonaryong kilusan at paulit-ulit nang napatutunayan sa nakaraan na lahat ng itinatakda ng papet na rehimen at AFP na dedlayn para raw durugin ang rebolusyonaryong kilusan ay nananatiling satsat lamang.

Walang pinagkaiba sa tahasang pasistang linya nina Gazmin at David ang linya ng bagong pinuno ng Office of the Presidential Adviser on the Peace Process (OPAPP) na si Teresita Deles. Walang pasubaling kinatigan ni Deles ang linyang DDR (*disarmament, demobilization and reintegration* o pagdidi-sarma, pagbubuwag at pagbabalik-loob ng mga rebelde) ng rehimeng Arroyo. Kahit lantarang pangwawasak ito sa usapang pangkapayapaan, baluktot pang ikinatwiran ni Deles na "ang DDR ay doktrina na bahagi ng anumang

**Mga tampok sa  
isyung ito...**

**Planong paghirang kay  
Etta Rosales, umani ng  
batikos** PAHINA 4

**20 sundalo napatay,  
8 armas nasamsam  
ng BHB** PAHINA 6

**Balik-tanaw sa PEACE  
Bonds**

PAHINA 7

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)